

## ***PITANJA SRCA***

Kada obratimo pažnju na svijet svoga vlastitog srca i uvažimo njegov tihi ali duboki govor, možemo vidjeti da se u našem srcu, neovisno o našem umu, s vremena na vrijeme pojavljuju neka pitanja. To su pitanja srca.

Neka od njih su intenzivnija neka manje intenzivna, ali svako od njih je duboko, i vezano za naš duhovni rast.

Ova pitanja nas ne opterećuju na način koji donosi težinu našem duhu. Ona lebde u našoj nutrini kao tajne i navode nas na put za oslušivanje odgovora.

Ponekad tako dolebde ispred naših očiju, i obično se tada ovo pitanje veže uz neku tada vidljivu pojavu, ponekad su prisutna unutar našeg uha kao podsjetnik na svoju konstantnu prisutnost.

Mada nas ne opterećuju ipak, ona nas izazivaju.

Ova pitanja su kao zagonetke koje nisu oblikovane našom artikulacijom, i tako nisu izašle u vanjski svijet. Pitanja srca su pitanja na koja nas navodi duh. Mudre izreke kažu da je slava kraljeva sakrivati tajne, a slava sinova otkrivati tajne I mada može vremenski potrajati da se svjesno suočimo sa ovim pitanjima srca, zapravo nakon toga mogu prilično brzo doći odgovori. A ti odgovori šire prostor našega duha.

Koliko mi obratimo pažnju na ova pitanja našega srca, toliko smo obratili pažnju na nas same, na naš duh. Koliko obratimo pažnju na ova pitanja toliko pokazujemo svoju mudrost, pokazujemo svoju sposobnost za prepoznavanje duhovnih putova i duhovnih vrijednosti.

Biblija piše o kraljici od Sabe, kraljici koja je došla sa kraja zemlje da bi porazgovarala o pitanjima svoga srca sa Salomonom, najmudrijim čovjekom na svijetu.

Ona nije baš vjerovala sve što je čula o njegovoj veličini i prvo je oprezno iskušala Solomona zagonetkama. A zatim mu je otvorila svoje srce: „Došavši k Salomonu, porazgovori se s njim o svemu što joj bijaše na srcu.. “

Uza sve bogatstvo i raskoš kojim je kraljica od Sabe bila okružena u svojoj zemlji, ona se odvažila na daleki, rizični i teški put da bi dobila odgovore koje je tražilo njeno srce. Glasovi o Salomonovoj mudrosti, koji su dopirali do njene zemlje, su oni bili

tako nevjerojatni da su izazivali sumnju, ali su bili i tako trajni i izazivali su ovu kraljicu.

Kraljica od Sabe je naučila na kraljevske vrijednosti i ona je ponijela darove ovom mudracu dostojne njenog kraljevskog bogatstva u zamjenu za mudrost za njeno srce, koju je duboko cijenila..

Biblija o tome ovako piše: „ Došla je u Jeruzalem sa golemom pratnjom, s devama koje su nosile mirise, nebrojeno zlato i drago kamenje...Dade tada kralju stotinu i dvadeset zlatnih talenata, mnogo miomirisa i dragulja.Nikad više nije bilo takvih miomirisa kakve je kraljica od Sabe dala Salomonu. “

Biblija piše da je Salomon kraljici odgovorio na sva pitanja; nije mu bilo sakriveno ništa da joj ne bi umio objasniti.Osim tih odgovora, Biblija piše da je kraljici „zastao dah “ kada je vidjela Salomonova djela mudrosti i ovako mu je rekla:

„ Istina je bila što sam u svojoj zemlji čula o tebi i o tvojoj mudrosti. Ali nisam htjela vjerovati što se propovijeda dokle god nisam došla i vidjela na svoje oči; i doista , ni pola mi nije bilo rečeno: ti nadvisuješ u mudrosti i blagostanju slavu o kojoj sam čula... “

Nakon toga, ona je dala slavu Salomonovom Bogu: “ Neka je blagoslovljen Jahve, Bog tvoj, komu si tako omililo da te postavio na prijestolje Izraelaca; zato što Jahve uvijek ljubi Izraela, postavio te kraljem da činiš pravo i pravicu. “

Kraljica od Sabe je uvažila svoja pitanja srca, ona je slijedila putove po kojima je slutila da bi je mogli dovesti do njenih odgovora.Ona se odvažila na ovaj put uza sve razumske opreze: nevjerovanje u glasine o tolikoj mudrosti, daleki rizični put; i uza svu cijenu, dakle mnoge skupocjene darove i velikoj pratnji.

Ova pitanja njenog srca dovela su ovu kraljicu do duhovne spoznaje, do Solomonovog Boga i ona je svojim ustima, duboko presvjedočena, proslavila Salomonovog Boga.

Slijedeći svoja pitanja srca, kraljica od Sabe, je slijedila tragove koji su je uveli u njen duhovni uzrast.

Možemo pogledati analogiju sa ovim događajem danas i usporediti ovaj događaj sa naukom evanđelja, i usporediti koliko je nama istina evanđelja nevjerojatno dobra,

koliko su nam glasine (propovijedanje) toliko dobro za ne povjerovati, koliko su nam vjerodostojno duboko znanje ovih istina.

Kada, pak pogledamo situaciju sa svojim pitanjima srca, možemo se zapitati:

Koliko zapravo mi dajemo važnosti našim pitanjima srca? I koliko ih cijenimo, odnosno koliko smo spremni odvojiti naših vrijednosti, našega vremena, za te odgovore? Sa kolikim postotkom rizika smo mi spremni krenuti na ovaj put?

I, da li smo spremni za išta od ovoga?

Jednom sam slušala na tv jednog političara koji je davao svoje mišljenje o jednoj javnoj osobi, i pri kraju svoga govora, govoreći više sam sebi, nego drugima, rekao je: „Ja sam zapravo uvijek dvojio, da li je on preintelligentan ili preglup.“

Ova dvojba ostavila je jedno otvoreno polje i ja sam shvatila da je to bilo jedno od pitanja srca ovoga političara koji je govorio. Njegov pogled je bio otvoren, kao da je tražio da se njemu odgovori, mada je on bio pozvan u emisiju da sam da odgovore. Ovo znanje nije bilo u njegovoj profesionalnoj domeni, niti u njegovoj sveukupnoj spoznaji.

Znala sam što znači kada se neko pitanje godinama pojavljuje u srcu. Ovaj političar je surađivao sa dotičnom osobom i ovo pitanje je za tu suradnju bilo vrlo bitno, ali ono što je bilo još bitnije je, da je to bilo pitanje njegovog srca, bez obzira koga se ticalo van njega samoga.

Znala sam odgovor na ovu dvojbu, naime, radilo se o demonizaciji uma, situaciji kada se dobije nadzemaljska inteligencija, nauštrb vlastite prirodne inteligencije, odnosno procesu kada osoba preko takvog dara, superiornog uma, postaje marioneta u rukama zlih sila, i nakon riječi ovoga političara, osjećala sam u srcu lagani nemir i znala sam da bih mu se trebala obratiti pismom, ali istovremeno, osjećala sam da postoji razlog zbog čega taj čin i nije baš nužan. Mada nisam znala koji je to razlog.

Nakon otprilike mjesec dana, ovaj političar je preminuo. Vjerujem da je dobio svoj odgovor.

Kao što sam rekla, pitanja srca su pitanja duha, i ona nas takva upućuju na znanje, na put, na kojem rastemo u spoznaji i duhu.

Prije nego sam uspostavila službu „Savršen zakon slobode “ godinama sam imala na srcu pitanje mudrosti. Nisam znala što bih sa tim pitanjem, malo sam znala o mudrosti samoj, pa sam je jednostavno molila. I tako sam shvatila da je danas mudrost još prisutnija, nego kod kralja Solomona.

I Isus za svoje vrijeme kaže, da je on veći od Solomona, a njegovi suvremenici ga odbijaju, dok je kraljica od Sabe došla Solomonu, koji je manji od Isusa, i to sa kraja zemlje i priznala Salomonovog Boga. I zato će, kaže Isus, kraljica od Sabe na sudu suditi Isusovim suvremenicima.

Mi danas možemo činiti i veća čuda od Isusovih čuda, to su i Isusove riječi. Mi tako danas možemo i spustiti na zemlju veću mudrost, nego što je bila u Isusovo vrijeme. Za ovo, mi trebamo biti hrabri slušati svoja pitanja srca, uvažavati svoje duhovne putove, i tako uvesti mudrost u svoj život.

A tako doći do najveće istine, a i drugima pokazati put mudrosti.

Ja znam da je Bog preko ove službe, donio odgovore na neka pitanja srca. Vjerujem da će donijeti i još. Ali, kako nas poučava Biblija kao kod slučaja kraljice od Sabe, koja je svojim ustima proslavila Boga nakon svjedočanstva koje je primila, ako mi ne zaštitimo odgovore na naša pitanja srca, ako ne zaštitimo to novo svjetlo u nama, ako ne damo slavu Bogu, priznanje njegovoj istini i mudrosti koju smo dobili, moguće je da to svjetlo zakrili tama naše tajnosti. Mi nismo kadri čuvati sami to svjetlo i njegova djela, a naša riječ je direktna dozvola onima koji to mogu.

I na kraju, pogledajmo kako je u ovom biblijskom primjeru o kraljici Sabi, mudrost darivala mudrost:

Mudrom kralju se svidjela mudra gesta ove kraljice, i nakon što je dobila odgovore na svoje zagonetke; na pitanja svoga srca; i još i više od toga, toliko svjedočanstava ove mudrosti da joj je zastao dah; i toliko da je svojim ustima kraljica poganskog naroda proslavila Boga, Biblija piše:

„Kralj Salomon dade kraljici od Sabe što je god zaželjela i zatražila, a povrh toga kraljevski je obdari. Potom ona krenu... “

